

Месяца декемврия в 15-день
Священномученика Илариона,
архиепископа Верейскаго
На малой вечерни

На Господи, воззвах: стихиры на 4, глас 6:

Егда Божиим попущением прииде на Церковь гонение лютое,
воздвиге тя Господь, Иларионе славне, Церкви непоколебимаго
столпа, мучеников украшение, сосуд честный Святаго Духа.

Егда любви и вера оскудеша и предания отеческая забвена быша,
Иларионе богомудре, писании твоими тьму лжеучений обличил
еси, святых отцев наследниче.

Егда волны ересей Церковь Божию обуреваху, ты, Иларионе,
богомудрыми словесы тех свирепство утишил еси.

Егда неистовии богоотступницы смущаху Церковь Божию, ты,
священномучениче Иларионе, верность первосвятителю Тихону
неколеблемо сохранил еси, благий образ всем подавая.

Слава, глас тойже:

Кто возможет восхвалити тя, избранниче Божий и Церкви
Христовы служителю, ересей обличителю и расколов
искоренителю, ты бо, колеблющияся вразумляй, и заблуждшия
на путь истинный наставляй, врагом Христовым противостав,
злобу диаволу посрамил еси и Христа мужески исповедал еси, То-
го моли спастися душам нашим.

И ныне, Богородичен, глас тойже:

Богородице, Дево Чистая, Церкви Христовы покрове, покрый нас
от всякаго зла и обстояния, сохраняющи чтущия Тя.

На стиховне стихиры, глас 4:

Доблестный святителю, святаго патриарха Тихона сподвижниче,
ты леств безбожных возненавидел еси, и соблазны их обличил
еси, и, судище неправедное претерпевая, венец победный стяжал
еси.

Стих: Многи скорби праведным, и от всех их избавит я Господь.
Егда святыня соловецкая поругана бысть, ты, архиерею Божий,
мерзость запустения в свято место претворяя, во узах в нощи
Святыя Пасхи возгласил еси: да воскреснет Бог и расточатся врази
Его.

Стих: Уста праведнаго поучатся премудрости, и язык его
возглаголет суд.

Премудрый наставниче пастырей, во отоцех соловецких заточение
претерпевая, разбойники на стезю покаяния направил еси,
отступники святыя веры обличил еси, малодушныя утешил еси,
изнемогающия укрепил еси. Темже и исповедник Христов
истинный явился еси.

Слава, и ныне, Богородичен, глас тойже:

Марие, Мати Пастырначальника, буди пастырем православным
Помощница, Церкви Христовы несокрушимая Стена, сохраняющи
от раздоров и нестроений, наипаче же от злобы безбожия и лютых
ересей.

Таже Ныне отпускаеши: Трисвятое, по Отче наш:

Тропарь, глас 4:

Святителю Христов Иларионе,/ славо и похвало Церкви Русския,/ разум божественный стяжав,/ пред безбожники Христа дерзновенно исповедал еси,/ Егоже ради страдания претерпевая,/ людем верным возглашал еси:/ без Церкви несть спасения.

На велицей вечерни

Блажен муж: 1-й антифон. На Господи, воззвах: стихиры на 8, глас 1:

О, священномучениче Иларионе, ревнителю патриаршества истинный, первосвятителю Тихону помощник верен был еси, Церковь Божию соблюдая во дни искушений и гонений. Темже вопием ти: радуйся, святителю Христов, Церкви Православныя ревностный поборниче.

Днесь радуется обитель Сретенская, имущи святяга мощи Илариона чуднаго, егоже память светло празднующи, хвалебно воспевают: радуйся, святителю Христов, Церкви Православныя ревностный поборниче.

О, богомудре Иларионе, благодатию Святаго Духа просвещенный, истину Православия утверждая, лукавыя изобличил еси и словом крестным безумие мира сего посрамил еси. Сего ради взываем ти: радуйся, святителю Христов, Церкви Православныя ревностный поборниче.

Агнцу Божию в терпении подражая, беззлобно темничная страдания, прещения и поношения, глад, мраз и болезни претерпел еси и, за враги моляся, Иларионе святе, кротко душу Христу предал еси. Сего ради ублажаем тя: радуйся, святителю Христов, Церкви Православныя ревностный поборниче.

Ины стихиры, глас 4:

От Бога обогащен чистотою душевною, постническими подвиги благодать Святаго Духа стяжал еси, добродетели любителю и греха победителю, земный Ангеле и Небесный человеце.

От юности Христа возлюбив, вся красная мира сего оставил еси, Иларионе славне, и, высшаго любомудрия взыскуя, в лик иночествующих вселился еси, земный Ангеле и Небесный человеце.

Очи сердечней писании Божественными просветил еси, блаженне Иларионе, темже, в богословии Православия высоту показуя, свидетель верен явился еси, и, каноны церковныя утверждая, вся ко спасению наставил еси, земный Ангеле и Небесный человеце. Видя яко безбожных множество на веру Христову ополчился, церкви святяга сокрушая и люди православныя истребляя, тогда со слезами к российским угодником о спасении народа Божия взывал еси, святителю Иларионе, земный Ангеле и Небесный человеце.

Слава, глас 8:

Приидите, людие российстии, священномученику Илариону верно поклонимся, и, тому подражающе, все упование на Христа возложим, и нечестия мирскаго отвергнемся, в вере же и чистоте

пребудем, поработаем Господеви и Его Церкви Святей, скорби и болезни до конца претерпим. Ты же, святой Иларионе, моли Христа Бога, да простит нам грехи наша и Царствия Небеснаго сподобит.

И ныне, Богородичен догматик, глас тойже: Царь Небесный: Вход. Прокимен дне. И чтения.

На литии стихира священномученика, глас 5:

Днесь ликует Собор новомучеников Российских, имея в себе священномученика всеславнаго, исповедника непоколебимаго, Илариона архиерея богомудраго и молитвенника теплаго о душах наших.

О, святителю Иларионе, ты, во всем божественным отцем последуя, о Церкви неложно богословствовал еси, сердце добрым подвигом очистив, о людех болезновал еси и, врагом Церкви противостав, колеблемыя утвердил еси. Темже ныне Святей Троице предстоя, молися о душах наших.

Слава, глас 1:

По имени твоему, Иларионе блаженне, и житие твое бысть: посреде бо мятежа мирскаго, тишину Христову стяжал еси, всегда радуяся и о всем благодаря, чистым сердцем Бога познал еси. И ныне молишися о душах наших.

И ныне, Богородичен, глас тойже:

Радуйся, Богородице Чистая, церковная Похвало, Столпе девства, премудрости Приятелище, Двере спасения. Не остави нас во тьме неведения пребывающих, просвети наша разумная очеса сердечная и сподоби ны узрети свет Царствия Божия.

На стиховне стихиры, глас 6:

Дар благодати Божественныя приял еси, Иларионе, избранниче Божий, крест бо взем, Христу последовал еси и, жизни вечныя взыскупа, вся суетная мира отвергл еси. Ныне же со всеми святыми на небесех ликуя, молися о душах наших.

Стих: На Тя, Господи, уповах, да не постыжуся во век.

Воли Божии последуя, жезл архипастырский, яко крест, в годину гонений приял еси и, к мученичеству за Христа уготовляяся, Того пред безбожными дерзновенно исповедал еси. Ныне же со всеми святыми на небесех ликуя, молися о душах наших.

Стих: Веселитесь о Господе и радуйтеся, праведнии, и хвалитесь, вси правии сердцем.

Духа Святаго исполненный, Иларионе дивный, посреде страданий и мрака неверия, пасхальныя радости причастник явился еси и свет невечерний зрети от Бога сподобился еси. Ныне же со всеми святыми на небесех ликуя, молися о душах наших.

Слава, глас 8:

Како наречем тя, священномучениче преславне? Веры ли Православныя ревнителя? Богослова ли преизящнаго? Устроения ли церковнаго рачителя? Мудрости ли отеческия хранителя? Проповедника ли дерзновеннаго? Ангелов ли небесных собеседника? Недоумевает ум именовать тя, ты бо еси Церкви Русския утверж-

дение, страны Российския слава и мучеников похвала.
И ныне, Богородичен, глас тойже:
Радуйся, Препоблагословенная Владычице, Сын бо Твой из мертвых
воста и нам дарова живот вечный.
Тропарь писан на на малой вечерни.
На утрени
На Бог Господь: тропарь дважды. Слава, и ныне, Богородичен,
глас тойже.
По 1-м стихословии седален, глас 6:
Мудрость честну не многими леты, но скорбьми и страданьми
стяжал еси, Иларионе святе, и Бога чистым разумом познал еси,
помози и нам причастники Божественныя премудрости соде-
латься.
Слава, и ныне, Богородичен, глас тойже:
О, Пресвятая Дево, Царице Небесная, из Тебе воплотися
Божественное Слово, и Человек бысть, да мы обожимся.
По 2-м стихословии седален, глас 4:
Днесь обитель Сретенская светло торжествует, крепкаго
молитвенника и пред Богом теплаго ходатая тя имущи, святителю
Иларионе, ты бо в годину гонений и еретических нападений
обитель сию добре упасл еси.
Слава, и ныне, Богородичен, глас тойже:
Пресвятая Богородице, Заре светлая Трисиятельного Света, Тобою
грады и обители утверждаются, советы вражия посрамляются,
сердца верных чистотою и любовию просвещаются, супостаты
низлагаются. Подаждь и нам победы на враги и спаси души наша.
Величание:
Величаем тя, святыи священномучениче Иларионе, и чтим
честная страдания твоя, яже за Христа претерпел еси.
По полиелеи седален, глас 5:
Воспоим, вернии, священномученика архиепископа Илариона, за
Церковь душу свою положившаго, Христова воина славнаго,
егоже днесь Русь святая достохвально величает.
Слава, и ныне, Богородичен, глас 1:
Мати Божия и Дево, в рождестве девство сохраняя, не остави нас
немощствующих, от бед и болезней сохрани и молитвами Твоими
избави от смерти души наша.
Степенна 1-й антифон 4-го гласа. Прокимен, глас 4: Проидохом
сквозе огонь и воду/ и извел еси ны в покой. Стих: Разжегл ны еси,
якоже разжизается сребро. Всякое дыхание: Евангелие от Матфеа,
зачало 36.
По 50-м псалме стихира, глас 6:
Буря напастей смущает мя, яко умножишася беззакония и оскуде
любвы, сего ради взываю к тебе, святителю Иларионе: буди ми
помощник и заступник, исцели и вразуми мя и на путь спасения
направи, и научи волю Божию творити.
Канон Богородицы со ирмосом на 6 и святаго священномученика
Илариона на 8, егоже краегранесие: Илариона славнаго Христова

ратника воспеваем. Глас 6.

Песнь 1

Ирмос: Волною морскою скрывшаго древле гонителя мучителя под землею скрыша спасенных отроцы: но мы яко отроковицы, Господеви поим, славно бо прославися.

Иларионе, всечестный святителю, по имени твоему и житие твое бысть, тишину бо молитвенную внутрь себе имея, радость пасхальную всем явил еси.

Лесть гонителей твоих отвергнув, мучения лютаго не убоялся еси, святе, Христа же пред судиями неправедными мужески исповедав, славою небесною прославился еси.

Ангелов собеседниче, Иларионе преподобне, во ограде дома Живоначальные Троицы, пожил еси, идеже постом и молитвою душу очистив, боговедение стяжал еси.

Ревность по Бозе имея, святителю, богоборцев словом обличал еси, такожде и еретических мудрований не терпя, нечестивыя из обителей и храмов изгонял еси, кающихся же ко спасению приводил еси.

Богородичен: Иныя помощи не имамы, разве Тебе, Владычице, Ты нам помози моря жития сего пучину яко по суху пройти не-искушенно от злых.

Катавасия: Отверзу уста моя:

Песнь 3

Ирмос: Тебе на водах повесившаго всю землю неодолимо, тварь видевши на лобном висима, ужасом многим содрагашеся, несть свят, разве Тебе, Господи, взывающи.

От юности чистоту возлюбив, Иларионе дивный, девственник душею и телом пребыл еси и, не пожелав поработати твари паче Творца, на земли невещественное житие показал еси.

Небесный человек, земный Ангеле, Иларионе премудре, святым отцем житием последуя, за Христа душу твою положил еси и земли Русския украшение явился еси.

Архиерею Божий, Иларионе святе, кротостию, смирением и терпением, паче же любовь преукрашен был еси, сего ради за мучителей твоих молился еси, Христу Богу подражая.

Святаго Духа дар стяжав, Сыну Божию, крест взял, последовал еси, и волю Отца Небеснаго исполнил еси, Иларионе блаженне, Троицы Святыя истинный почитателю.

Богородичен: Лестнице Небесная, Бюже сниде Бог, долу лежащее естество наше к небеси возводиши, темже Тя, Пресвятая Богородице, любовь не престанно величаем.

Седален, глас 7:

Священномучениче славне Иларионе, архиерею и друже Христов, ты, в темнице заключен быв, не восхотел еси слугам антихристовым поклонитися, якоже и мученицы древле не возжелаша жертву идольскую принести. Сего ради помози нам молитвами твоими стрелы вражия отразити и козни диавольския разорити, единого же Христа распята выну очесы умными зрети

и Тому из глубины сердечныя взывати: Господи, Иисусе Христе, помилуй нас.

Слава, и ныне, Богородичен, глас тойже:

Предстательнице и Молитвеннице наша, Пресвятая Владычице, умоли Сына Твоего и Бога, егда сядет судити живым и мертвым, да простит грехи и беззакония наша, и сподобит ны Царствия Небеснаго.

Песнь 4

Ирмос: На Кресте Твое Божественное истощание провидя Аввакум, ужасся вопияше: Ты сильных пресекал еси державу, Блаже, приобщаяся сущим во аде, яко Всесилен.

Апостольское слово исполняя, в безбожном мире Христа проповедал еси, Иларионе богомудре, и Церковь Его от волков, расхищающих ю, неусыпно охранял еси.

Велика тайна есть Церкви, яко невесты Христовы, юже ты, Иларионе, чистым сердцем узрел еси и ясно провозгласил еси. Небесныя любве дара удостоен быв, Иларионе, Бога Троицу во Единице, Иже есть Любы, исповедал еси и о Церкви Святей, яже есть любве единение, богословствовал еси.

Адамант веры быв и отеческих заветов хранитель, святителю Иларионе, лукавыми учении не смущаемь, Богородицу Чистую, яко Деву и Матерь, прославил еси.

Богородичен: Голгофе предстоящи, Матерь Божия скорбно взываше: увы Мне, Сыне Мой! Како на Кресте висиши, землю на водах повесивый? Како страсти терпиши, пришедый спасти мир?

Песнь 5

Ирмос: Богоявления Твоего, Христе, к нам милостивно бывшаго, Исаия свет видево не вечерний, из ноци утреневав взываше: воскреснут мертвии, и востанут сущии во гробех, и вси земнороднии возрадуются.

О, святителю Христов Иларионе, помози нам ночь жития сего скорбнаго в терпении и покаянии без порока прейти, и радости света не вечерняго сподобитися.

Христовым пастырем правило был еси, Иларионе, и наставник терпеливый, не токмо словом, но и делом образ им показуя, и благодатию, тебе от Бога данною, укрепляя.

Радости духовныя исполнен, Иларионе, шествовал еси путем тесным и прискорбным, всех уча Христу сраспинатися, дабы с Ним воскреснути.

Иноцы обители Сретенския днесь прославляют архипастыря Илариона, служителя благоговейнаго Девы Пренепорочныя, славу Владимирскому образу Ея достойно воздавашаго и тем прещения безбожных презревшаго.

Богородичен: Славим Тя немолчно, Владычице, и ко иконе Твоей Владимирстей припадаем, взывающе: покрый град Москву от тьмы греховныя и безбожныя и спаси души наша.

Песнь 6

Ирмос: Ят бысть, но не удержан в персех китовых Иона: Твой бо

образ нося, Страдавшего и погребению Давшагося, яко от чертога от зверя изыде, приглашаше же кустодии: хранящий суетная и ложная, милость сию оставили есте.

Ты, иерарше честный, о устроении Церкви Русския ревнуя, из глубины душевныя Христу Богу взывал еси: Господи, чин патриарший возстави и единомыслие в Церкви соблюди. О, Иларионе блаженне, ты, Собору мужей церковных предстоя, мудрым словом, благодатию растворенным, призвал еси их патриаршеством Церковь Русскую паки украсити и по достоянию возвеличити.

Всечестный Иларионе святителю, верный сподвижник Тихона патриарха явился еси, Церковь от безбожных властей и раздирающих хитон Христов доблественне охраняя. Архиеерея достославнаго Илариона Верейскаго днесь, вернии людие, благочестно восхвалим, той бо град Москву от поновляющих и изменяющих чин церковный огради и верных в благочестии утверди.

Богородичен: Радуйся, Царице Небесная, Патриархов православных Похвало, обителей святых нерушимая Стено, града же нашего первопрестольнаго и страны Российския Утверждение. Кондак, глас 2:

Славу мира сего оставив, Христу доблественне последовал еси и, святительское служение восприим, венцем мученичества украсился еси, и ныне, Престолу Божию предстоя, молися, Иларионе, иерарше премудре, спаситися душам нашим.

Икос:

Светом божественныя мудрости, Иларионе святыи, исполни ум мой помраченный, да восхваляю житие твое, взывая сице:

Радуйся, Христа Бога верный служителю;

радуйся, Церкви Его истинный исповедниче.

Радуйся, юных добрый наставниче;

радуйся, Слова Божия изрядный проповедниче.

Радуйся, верным путь спасения возвестивый;

радуйся, хитросплетения суетная посрамивый.

Радуйся, патриаршества Российскаго ревнителю;

радуйся, отеческих заветов дивный хранителю.

Радуйся, Иларионе, Церкви наша слава и украшение.

Песнь 7

Ирмос: Неизреченное чудо, в пещи избавивый преподобныя отроки из пламене, во гробе мертв бездыханен полагается, во спасение нас поющих: Избавителю Боже, благословен еси.

Аще не явилася бы велия ревность новомучеников Российских, погибла бы вера Православная во отечестве нашем. Ты же, святителю Иларионе, с ними страдания претерпевая, взывал еси: Избавителю Боже, благословен еси.

Труды и подвиги, священномучениче Иларионе, богоугодне понесл еси, имиже разорители Церкви Христовы посрамлены быша, вернии же восклицаху: Избавителю Боже, благословен еси.

Наставник монахом быв, Иларионе святе, ты во время лихолетия обитель Сретенскую от нечестивых защищал еси. И ныне тамо мощами почиваеши, иноков ея научая звать: Избавителю Боже, благословен еси.

Иларионе святе, Церкви Русския похвало, сподоби нас, немощных и грешных, молитвами твоими от пламене страстей избавиться и от искушений невредимы сохранитися, Господеви зывающе: Избавителю Боже, благословен еси.

Богородичен: Кто Тебе не прославит, Пресвятая Дево, Ты бо еси Роса небесная, греховный пламень угашающая и верная благодатию исполняющая. Темже Тебе вопием: избави нас вечнаго осуждения и спаси души наша.

Песнь 8

Ирмос: Ужаснися бояйся небо, и да подвижатся основания земли: се бо, в мертвецах вменяется в вышних Живый, и во гроб мал странноприемлется: Егоже, отроцы, благословите, священницы, воспойте, людие, превозносите во вся веки.

Агнца Божия возлюбив и духа мира сего отвергнув, единаго истиннаго Бога служитель пребыл еси, Иларионе славне, ныне же на Небеси Владыце всех предстоиши. Егоже, отроцы, благословите, священницы, воспойте, людие, превозносите во вся веки.

Внегда вся власть тьмы на Церковь Русскую ополчися, тогда ты, Иларионе, духом крепкий, Христа исповедати не убоялся еси. Егоже, отроцы, благословите, священницы, воспойте, людие, превозносите во вся веки.

О, священная и спасительная ночь Пасхи, егда ты, святителю Христов, во узах соловецких возгласи: да воскреснет Бог! Егоже, отроцы, благословите, священницы, воспойте, людие, превозносите во вся веки.

Соловецкая земле многострадальная, возрадуйся и возвеселися: Иларион бо предивный с сонмом новомучеников на небесех за Русь Святую молит ныне Царя Славы. Егоже, отроцы, благословите, священницы, воспойте, людие, превозносите во вся веки.

Богородичен: Пресвятая Дево, на Небеса к Сыну Твоему возшла еси и нас, сирых, на земли не оставила еси; покрый честным Твоим омофором обители и грады наша, жизнь вечную подаючи всем воспевающим Тя.

Песнь 9

Ирмос: Не рыдай Мене, Мати, зрящи во гробе, Егоже во чреве без семени зачала еси Сына: встану бо и прославлюся, и вознесу со славою, непрестанно, яко Бог, верою и любовью Тя величающия. Егда во врачебнице темничней Петрова града огневицею тело твое палимо бе, душа твоя, яко на водах упокоения радостию исполнися, и, сетей князя мира сего избегнув, ко Христу отыде. Воине Христов, Иларионе славне, ты Господа в житии твоём небызненно исповедав, кончины блаженныя сподобился еси.

Темже взываем: моли милостиваго Бога, да подаст нам во истинней вере живот свой скончати.

Ангельское пение и звон пасхальный друзи твои и сродницы, услышавше, возрадовашася, Иларионе, уразумеша бо, яко душа твоя чистая на небо восход совершаше.

Егда тело твое многоболезненное во гробе положено бысть, чада твоя духовная со слезами к тебе взываху: молися о нас, праведниче, у престола Господня.

Богородичен: Мати Безневестная, не лиши нас Твоего заступления, умоли Милосерднаго Судию оправдати ны, верою и любовью Тя величающих.

Светилен:

Вси святии Церкви Русския ныне торжествуют светло, священномученика и архиерея Илариона зряще, с ними Троице Божественней молитвенно предстоящаго.

Слава, и ныне, Богородичен:

Пресвятая Богородице, дивное селение Бога и Слова, помози нам, Милостивая, молитвами Твоими терпение и упование стяжати, и спасение улучшить.

На хвалитех стихиры на 4, глас 8:

О, преславне святителю Иларионе, учителю истиннаго богословия, тебе от Бога дарована бысть мудрость благодатная, во след отцем шествовати и истину Церкви возвещати. Сего ради просвети души наша помраченныя, в разуме церковнем утверждая.

О, предивне священномучениче Иларионе, на судищи безбожном стоя, ты Христа мужески исповедал еси и верныя в подвизе укрепил еси, темже помози и нам в житии Христу последовати, да не посрамлени будем на судищи Божиим.

О, достохвальне архиерею Христов Иларионе, благодатныя силы исполнен, образ истиннаго пастыря явил еси, и о единстве церковнем неусыпно ревновал еси, темже буди и нам пастырь добрый и к любви истинней настави.

О, Иларионе, священномучениче добле, ты, на Крест Христов взирая, миру сему распялся еси, оскорбления и болезни смиренно претерпевая. Темже моли Христа Бога укрепити ны на пути крестнем и сердца наша светом неприступным просветити.

Слава, глас 6:

Сердце добрым подвигом предочистив, блага мира сего презрел еси, Иларионе священномучениче, и Христа пред безбожники небаязненно исповедав, благодать Святаго Духа стяжал еси. Темже имый дерзновение ко Христу Богу, моли Того спастися душам нашим.

И ныне, Богородичен, глас тойже:

Богородице, Ты еси Лоза истинная, возрастившая нам Плод Живота, Тебе молимся, молися, Владычице, со святыми апостолами и священномучеником Иларионом, помиловати души наша.

На Литургии

Блаженна от канона святого, песнь 3-я и 6-я. Прокимен, глас 1:
Уста моя возглаголют премудрость, и поучение сердца моего
разум. Стих: Услышите сия вси языцы, внушите вси живущии по
вселенней. Апостол ко Евреем, зачало 318. Аллилуиа, глас 1: Терпя
потерпех Господа, и внят ми, и услыша молитву мою. Стих:
Мужайтесь, и да крепится сердце ваше, вси уповающи на
Господа. Евангелие от Иоанна, зачало 36. Причастен: В память
вечную: